


## Diagramme

Wi wüllt nu de ünnerscheidlich Priesen för de Levensmiddel grafisch wiesen – in en Diagramm. Dat is en Kinnerspeel.

- Markeert Se sik toerst den Deel vun de Tabell, de in dat Diagramm verhackstückt warrn schall. Hier sünd dat de Zellen A1 bet B7.
- Nu klickt Se op dat Symbol  op de Symboollist.
- De Dialog **Neues Diagramm** geht op, un Se köönt hier bestimmen, woans dat Diagramm utsehn schall.


	A	B
1	<b>Zutat</b>	<b>Kilopreis</b>
2	Rinderfilet	25,00 €
3	Kartoffeln	3,00 €
4	Champignons	6,00 €
5	Frühlingszwiebeln	3,80 €
6	Zanderfilet	30,00 €
7	Blaubeeren	5,00 €
8		



- In'n Beriek **Diagrammtyp A** wählt wi dat 3D-Balkendiagramm.
- Foorts wiest rechts de **Vorschau B**, wa dat utsehn warrt.
- Se köönt dat Diagramm in't Feld **C** noch en Überschrift geven, wenn Se wüllt, un bi **D** köönt Se de **Gitternetzlinien** bestellen. Mit Gitternetzlinien sünd Tallenweerte in Diagramme faken beter to kenne. Allens düt Tobehör is avers friewillig. De Vorschau wiest dat Ergeevnis.
- **OK.** – Zack, is dat Diagramm da!


Un woneem is de Tabell? – Se köönt över dat Menü **Ansicht** twüschen Diagramm un Tabell wesseln: **Ansicht | Kalkulationstabelle** schalt op de Tabell üm, **Ansicht | Diagramm** op dat Diagramm. Wenn Se stückerwat Diagramme to en Tabell maakt hebbt, köönt Se mit **Ansicht | Diagramm** dat Diagramm utwählen, dat Se sehn wüllt!

*Bi stückerwat Diagramme gifft't en Utwahllist*



## Diagramm vermurkst?

Wenn Ehr Diagramm jichenswie nich vernünftig utsüht, kann't an liggen, dat Works sik an Reegn un Spalten verslückt hett. Gaht Se bi't Erstelln vun dat Diagramm op de Registerkoort **Weitere Optionen** un kiekt Se na, wat de Opschoon **In Zeilen** anklickt is. Düt kann en Diagramm vermurksen, wenn de Weerte in Wahrheit in Spalten ünnerganner staht. Klickt Se denn **In Spalten** an.



*De Vorschau weist: So is dat nich vernünftig!*



## Diagramm jümmers aktuell!

Ändert Se mal een vun de Tallenweerte, de in't Diagramm weist warrt! Flupp, dat Diagramm is ok ännert! Jüst liekso as Formeln sünd Diagramme jümmers aktuell.



## Diagramm formateern

Mucht Se de Klöör vun de Diagrammsülen nich lieden? Se köönt ehr ännern:

- Klickt Se op een vun de Säulen mit de rechte Muustast.
- Wählt Se ut dat Kontextmenü **Schattierung und Farbe...**
- In den Dialog, de nu kümmt, legt Se **Farbe** un **Muster** fest, klickt **Formatieren** un denn **Schließen**.




De Beschriften sünd eentlich veel to lütt för dat grote Diagramm, nich? Ännert wi dat!

- Klickt Se op een vun de Beschriften an jichenseen vun de Assen.
- De eerst un letzt Beschriften warrt nu ümrahmt, as Teken, dat all markeert sünd.
- Nu köönt Se de Formatsymbolen  un  op de Symboolliest bruken.
- Dorbi warrt automaatsch de kumplette Beschriften an de Assen vun't Diagramm formateert.


Wüllt Se de Schriftklöör ännern orr en **Duchgestrichen**-Effekt bruken, denn maakt Se dat so:

- Rechtsklickt Se een vun de Beschriften an de Assen un wähl't Se ut dat Kontextmenü **Schriftart**.
- Nu kümmt de Dialog **Zeichen** vörtüüg, 'neem Se blangen Schriftart & Co. ok de Schriftklöör instelln köönt.



Muchen Se de Gitternetzlinien loswarrn? Dat köönt Se för de waagrechten un lootrechten Linien separat maken:

- Rechtsklickt Se en Beschriften op de lootrechte Ass un wähl't Se ut dat Kontextmenü **Y-Achse (vertikal)**.




- In'n Dialog **Y-Achse** köönt Se de Gitternetzlinien för düsse Ass an un ut klicken un sogoor de ganze Ass wegmaken.


Datsülvige gelt för de X-Ass, also de waagrechte Ass. – Mehrst willt de Gitternetzlinien vun de Y-Ass

behollen, man op de vun de X-Ass kannst verzichten.

Muchen Se noch extra Assentitel, orr mucht Se den Titel vun't Diagramm ännern? Denn rechtsklickt Se den Titel vun't Diagramm un wählt ut dat Kontextmenü **Titel...**





In'n Dialoog **Titel** köönt Se den Diagrammtitel ännern orr för de Assen egen Titel dortosetten.







Nadem dat Se **OK** klickt hebbt, kaamt de Beschriften vörtüüg, avers noch bannig lüüt. Wi mööt de Schrift noch beten op de Sprüng helpen. Rechtsklick, **Schriftart!** – Dat kennt Se ja allens intwüsch.

Wüllt Se wat Grundsätzlichs an't Diagramm verännern? Dorto giff't op de Symboollist in de Diagrammansicht en poor heel nütte Symboln!



- Mit  köönt Se den ganzen Diagrammtyp op een Schlag ännern! Wählt Se in'n Dialoog **Diagrammtyp** t.B. en Tortendiagramm (**Kreisdiagramm**), denn köönt Se op de Registerkoort **Varianten** wesseln un sik dor ut ünnerscheidlich Ünnerotypen een utsöken. Hier hebbt Se veel mehr Utwahl as bi't Erstellen vun't Diagramm! Ok uns Balkendiagramm hett Ünnerotypen, en Blick in de **Varianten** lohnt.




*Mennig Varianten vun de Diagrammtypen giff't hier*

- Mit  köönt Se den Rahmen üm de ganze Grafik an- un utknipsen.
-  schalt't de Gitternetzlinien kumplett ut orr an. – Fiener geiht dat avers mit de Methoden för de enkelten Assen, de Se ja al kennt.
-  schalt't den 3D-Effekt an un ut.
- Un  schalt't swupps na de Tabell.

## Diagramm drucken

Ok op de Symboolliest vun't Diagramm giff dat dat Druckersymbol  un dat **Seitenansicht**-Symbol , dat een beter toerst bruken schull.

En Blick in de **Seitenansicht** övertüügt Maren gau, dat Diagramme in't Dweerformat druckt höört. Also **Schließen** vun de Seitenansicht un af in't Menü **Datei | Seite einrichten**, 'neem se op de Registerkoort **Zufuhr, Größe & Orientierung** dat **Querformat** bestellt. Denn kann Maren den **Drucken**-Knoop  klicken orr, wenn se Sünnerrwünsch hett, **Datei | Drucken** wählen. Fertig.

